

Informacion për shërbesën “Rruga”

Shërbesa “Rruga” është shërbesa ndërkombëtare radiofonike dhe televizive e Dr. Michael Youssef. Kjo shërbesë I shpall Fjalën e Perëndisë miliona njerëzve në të gjithë botën.

Programet radiofonike në anglisht transmetohen në Amerikën e Veriut, në Mbretërinë e Bashkuar, Australi dhe Zelandën e Re. Programet radiofonike në dy gjuhë, transmetohen rreth e qark globit në një format unik, që përkthen mesazhin e Ungjillit, fjali për fjali nga anglishtja në një numer të konsiderueshëm gjuhësh si ajo arabe, mandarine, indoneziane, turke, punjabi, ruse, farsi, franceze, hindu, bengali, koreane, spanjolle, kantoneze, tamil, vietnameze, amharike dhe shqipe. Programi televiziv transmetohet cdo jave në Amerikën e Veriut, Lindjen e Mesme, Afrikën e Veriut, Mbretërinë e Bashkuar, Australi dhe Zelandën e Re.

Copyright 2005 nga Dr. Michael Youssef
GJITHE TE DREJTAT JANE TE REZERVUARA

Ky libër nuk duhet të riprodhohet në asnjë formë pa lejen me shkrim të autorit.

Për më shumë informacion kontaktoni:

Leading The Way with Dr. Michael Youssef

P.O. Box 20100

Atlanta, GA 30325

404-841-0100

www.leadingtheway.org

Shkrimet Biblike janë marë nga Versioni i Ri Amerikan e Biblës.

THE LOCKMAN FOUNDATION
1960,1962,1963,1968,1971,1972,1973,1975,1977

Përdorim i licensuar.

Titulli:

Shtatë hapat në aventurën e besimit tënd

Përktheu:

Anri **Pashaj**

Redaktoi:

Enkelejda **Kumaraku**

Të drejtën për botimin në shqip “Radio 7”

Tirazhi 2000 copë

*Shtatë hapat në
aventurën e besimit tënd*

*Seven Steps in Your
Faith Adventure*

Dr. Michael Youssef

Shumicës së njerëzve u pëlqejnë shumë festat! Ata kënaqen shumë, kur bashkohen me njerëzit e dashur për të festuar një ngjarje të rëndësishme të jetës së tyre, apo të dikujt tjetër, një ditëlindje, apo përvjetor, një ditë diplomimi, fejesën, apo martesën, lindjen e një foshnjeje, festimin e hyrjes në një punë të re, ngritjen në detyrë, një ndërmarrje të re të suksesshme, daljen në pension, një festë për të uruar rrugë të mbarë për një udhëtim... Shumica e njerëzve nuk kanë nevojë që të kenë ndonjë arsye të madhe për të festuar!

A e di që në Parajsë bëhet festë kur një mëkatar, apo mëkatore e humbur njih Jezus Krishtin si Shpëtimtarin e tij, apo të saj?
Jezusi tha: “Në qiell do të ketë më shumë gëzim për një mëkatar të vetëm që pendohet, sesa për nëntëdhjetë e nëntë të drejtët, që nuk kanë nevojë të pendohen.” (Luka 15:7). Ai tha gjithashtu: “Do të ketë gëzim në mes të engjëjve të Perëndisë për një mëkatar të vetëm që pendohet” (Luka 15:10). Sa moment i gëzueshëm ishte në Parajsë kur ti pranove Jezusin si Shpëtimtarin tënd dhe more

falas dhuratën e Tij të shpëtimit të përjetshëm si dhe praninë e Frymës së Shenjtë në jetën tënde!

Në Lindjen e Mesme, dasmat janë një ngjarje e rëndësishme, po aq sa janë praktikisht në çdo vend. Dasma është festa kulmore, është një kohë muzike, kënge, festimi, dhënie dhuratash si dhe e një kremtimi të madh. A e di që Perëndia gëzohet për marrëdhënien e Tij të re me ty, ashtu siç gëzohet dhëndri në dasmën e tij? Bibla thotë: “Ashtu si i martuari gëzohet me nusen, kështu Perëndia do të gëzohet për ty” (Isaia 62:5). Tani o mik, kësaj i them lumturi unë!

Padyshim që në kohën kur u linde sërish, besoj e ke ndjerë lumturinë e Parajsës si dhe lumturinë e të krishterëve të tjerë që ti njeh. Pjetri tha këtë gjë në lidhje me ata që fillojnë ta besojnë Jezus Krishtin si Shpëtimtarin e tyre: “... ngazëllohuni nga një hare e patregueshme dhe e lavdishme, duke arritur përmbushjen e besimit tuaj, shpëtimin e shpirtrave” (1 Pjetrit 1:8). Çdo gjë në lidhje me shpëtimin tonë është e lavdishme dhe e gëzueshme.

Por, ç'mund të thuash për ditën pasi

e pranove Krishtin? Po atëherë?
Në botën natyrale, dita pas një festimi të madh mund të ketë një “zhgënjim,” një kohë rënieje emocionale. Por kjo nuk është e vërtetë për besimtarin e ri! Dita pasi pranon Jezus Krishtin është një ditë gëzimi edhe më të madh, pasi ti hyn në një jetë të re. Dita pasi pranon Jezus Krishtin është dita kur aventura e besimit tënd fillon në të vërtetë. Tani vjen koha që të rritesh tek Krishti, e me këtë rritje, do të shikosh që gëzimi yt thellohet, piqet e bëhet më i madh se ç’e ke imagjinuar ndonjëherë.

Ka shtatë hapa të cilat unë ia rekomandoj çdo besimtari, që t’i ndër marrë për t’u siguruar që jeta e tij në Krisht të ketë një nisje të mirë. Por këto hapa meqë ra fjala, janë hapat që çdo besimtar duhet të vazhdojë t’i hedhë çdo ditë të jetës së tij. Ato janë baza që formon një themel të fortë për një aventurë në besimin e krishterë.

Hapi 1: LEXOJE BIBLËN TËNDE PËRDITË.

Një nga gjërat më të rëndësishme që duhet të dish si besimtar që je, është ajo që të thotë Perëndia. Nuk mjafton të dish atë që mund të thonë

pastori, një ungjilltar në televizor, apo të krishterë të tjerë. Ti duhet të dish atë që thotë Perëndia. Mesazhi i tij për ty është mesazhi i Biblës.

Bibla është letra e dashurisë që Perëndia të ka nisur ty. Në të, Perëndia të tregon se sa shumë kujdeset ai për ty e se çfarë dëshiron që të të sigurojë. Bibla të tregon se si Perëndia dëshiron të të mbrojë, si fëmijën e tij të dashur, nga ligësia. Urdhëresat e Perëndisë nuk u dhanë për t'i kufizuar fëmijët e Perëndisë në kënaqësitë e tyre, por në fakt për t'i mbrojtur nga ato gjëra që shkaktojnë dëmtim fizik, emocional dhe shpirtëror. Bibla na tregon se si Perëndia ka punuar në jetët e burrave dhe grave përgjatë epokave, gjë që Perëndia dëshiron ta bëjë edhe në jetën tënde sot.

Shumë njerëzit e kanë patur të vështirë kuptimin e Biblës përpara se të shpëtoheshin, por pasi u shpëtuan, dukej sikur dikush e kishte ndryshuar Biblën e tyre. Papritur mund të merrnin kuptimin e asaj që po lexonin. Mendoj që kjo gjë do të ndodhë edhe për ju. Në Bibël ka disa gjëra që kuptohen krejtësisht vetëm nga ata që e kanë pranuar Jezus Krishtin si Shpëtimtarin e tyre.

Eshtë shumë e rëndësishme që të lexoni një Bibël që është e lehtë për ju për t'u lexuar, e shkruar në një gjuhë që është e qartë. Ka shumë përkthime e versione të mira të disponueshme të Biblës. Unë të sugjeroj që të shkosh në një librari të krishterë e të shikosh disa versione. Kalo ca kohë për të parë se cilin përkthim e lexon më me ëndje. Një kapitull i mirë për t'u lexuar në versione të ndryshme është Luka 15.

Pastaj fillo ta lexosh Biblën tënde përditë. Përse ditë për ditë? Ashtu siç trupi yt ka nevojë për ushqim të mirë çdo ditë, po ashtu edhe shpirti yt ka nevojë për ushqim të mirë! Ushqehu me Fjalën e Perëndisë, sepse ajo është ushqim shpirtëror për psikikën tënde. Me të vërtetë që kështu është!

Përpara se të lexosh, lutu e kërkoji Perëndisë të të ndihmojë që të kuptosh domethënien e asaj që do të lexosh, përfshi këtu mënyrën se si ta zbatosh atë që lexon në jetën tënde ... tamam tani. Ndërkohë që lexon, pyet veten: "Çfarë domethënieje ka kjo për situatën dhe rrethanat me të cilat po përballem tamam tani? Si mund ta vë në përdorim

këtë informacion?” Pasi të kesh përfunduar leximin për atë ditë, lutu e kërkoi Zotit të të ndihmojë që ta mbash mend atë që ke lexuar e që të bësh atë që ke ndjerë që Perëndia do që të bësh. Bibla na thotë që Perëndia do që ne të jemi “bërës” të fjalës, jo vetëm “dëgjues” të saj (Jakobi 1:22).

Një nga mënyrat më të mira për të lexuar Biblën, është leximi me zë. Leximi me zë të ndihmon që të mbash mend atë që lexove. Të ndihmon gjithashtu që të përqendrohesh tek leximi e që të mësosh më shumë nga ajo që lexove.

Në fillim të jetës tënde të re në Jezus Krisht, ti duhet që të përqendrohesh në leximin e Ungjijve, katër librave të parë të Beslidhjes së re: Mateu, Marku, Luka dhe Gjoni. Përqendrohu veçanërisht tek ato që tha e bëri Jezusi. Pastaj lexo Veprat e Apostujve, Romakëve dhe 1 Gjonit.

Ndërkohë që rritesh në Krisht, zgjerohu dhe lexo nga të gjitha pjesët e Biblës. Unë personalisht për leximin tim të përditshëm përdor një Bibël që quhet: *The Daily Bible in Chronological Order – (Bibla Përditë Sipas Rendit Kronologjik).**

Ka edhe versione të tjerë të Biblës të cilat janë të ndara në lexime të përditshme, në mënyrë që përgjatë një viti, të mund të kesh lexuar të tërë Biblën. Çfarëdo formati të zgjedhësh, sigurohu që t'i lexosh të gjitha pjesët e Biblës. Një lexim i mirë i përditshëm duhet të përfshijë një sërë pasazhesh nga pjesë të ndryshme të saj. Disa njerëz lexojnë dy kapituj të Beslidhjes së Vjetër, ose dy kapituj të Psalmeve, një kapitull të Fjalëve të Urta, dy kapituj nga Ungjijtë (Mateu, Marku, Luka dhe Gjoni) e dy kapituj nga libra të tjerë të Beslidhjes së Re. Ky është një lexim shumë i mirë e i drejtpeshuar e do të kërkojë vetëm 15, APO 20 minuta për një lexues mesatar, rreth e njëjta periudhë kohe që zgjat një vakt.

Sa më tepër që të lexosh Biblën, aq më shumë do të përjetosh një ripërtëritje të mendjes tënde (shiko Romakëve 12:2). Qëndrimet e vjetra, besimet e vjetra dhe “zakonet e vjetra mendore” do të ndryshohen. Ti do të përjetosh një mënyrë të re mendimi dhe reagimi ndaj botës – me dy fjalë, do të fillosh të mendosh e reagosh “sipas mënyrës së Perëndisë”. Të mendosh e reagosh

sipas mënyrës së Perëndisë, është të shikosh si Jezusi, të dëgjosh si Jezusi e të veprosht si Jezusi. Jeta e Jezusit ishte një jetë pa mëkat e me gëzim, qëllim dhe bekime tepër të mëdha! A mund të ketë një mënyrë më të mirë jetese sesa të jetosh si Jezusi?

Për të zbuluar më shumë në lidhje me rëndësinë që i vë Perëndia leximit të Biblës, lexo Psalmin 119. Ky psalm i gjatë i kushtohet thujtse tërësish dobive që ka leximi, studimi dhe njohja e Fjalës së Perëndisë.

Hapi 2: LUTU SHPESH.

Lutja nuk është vetëm kërkesa ndaj Perëndisë. Në fakt, Bibla na bën thirrje që të hyjmë në praninë e Perëndisë me lavdërime dhe falënderime (shiko Psalmin 100:4). Falenderoje Perëndinë për gjithçka që ka bërë për ty, përfshi edhe shpëtimin tënd. Lavdëroje Perëndinë për gjithçka që Ai është për ty. Jezusi i mësoi dishepujt e tij që t'i fillonin lutjet e tyre kështu: “Ati ynë që je në qiell, u shenjtëroftë emri yt” (Shiko Mateu 6:9). Të “shenjtërosh” emrin e Zotit do të thotë që të kujtosh mënyrat e ndryshme në të cilat Perëndia është i gjithfuqishëm, i gjithditur,

gjithpranishëm e gjithdashës. Do të thotë që ta lavdërosh Perëndinë që është mbrojtësi, siguruesi, ngushëlluesi, këshilluesi, shëruesi, çliruesi dhe miku yt. Do të shikosh që sa më shumë që ta lavdërosh e ta falënderosh Zotin, aq më shumë Zoti do të punojë në zemrën dhe mendjen tënde, e aq më shumë do të zbehen problemet e tua kur krahasohen me Të.

Në lutjen tënde të përditshme, pohoji Zotit që ke mëkatuar. Pranoji gjërat në të cilat nuk ke arritur të bësh atë që e dije se duhet të bëje, ose për gjërat ku ke rrebeluar e bërë atë që e dije se nuk duhej bërë. Bibla na premtan që: “Po t’i rrëfejmë mëkatet tona, ai është besnik dhe i drejtë që të na falë mëkatet dhe të na pastrojë nga çdo paudhësi “ (1 Gjoni 1:9). Ashtu siç kemi nevojë të bëjmë banjë përditë, duhet që të pastrojmë edhe shpirtrat tanë duke i pohuar mëkatet tonë e duke marrë faljen e Perëndisë.

Pasi të kesh shijuar një kohë lavdërimi përpara Zotit, të kesh rrëfyer mëkatet e tua e të kesh marrë faljen nga Zoti, ki guxim në paraqitjen e nevojave të tua e të të dashurve të tu, tek Zoti. Të lutesh do të thotë të bësh një “peticion” për Zotin, t’i kërkosh Perëndisë

që të veprojë për ty, ose për dikë tjetër në një mënyrë të atillë që të jetë e vlefshme për dobinë tënde të përjetshme. Është gjithmonë mirë që të lutesh për një person që është i humbur që të njohë Jezus Krishtin si Shpëtimtarin e tij, apo të saj. Nëse po pyet veten se për çfarë gjëje tjetër mund të lutesh për dikë tjetër, unë të rekomandoj që të lexosh lutjen e apostullit Pal tek Kolosianëve 1:9-12. Ajo është një lutje e mrekullueshme që vlen për të gjithë. Bëje atë lutje edhe për vete! Zoti i përgjigjet lutjeve tona, por jo gjithmonë ashtu siç e presim, apo do ta donim ne. Përgjigjet e Tij ndaj nesh janë “po,” “jo,” “jo tani” dhe “nëse... atëherë...”. Besoji Perëndisë që ai të të japë përgjigjen që do të jetë më e mira për ty e për të tjerët rreth teje, jo vetëm për momentin e tanishëm, por për të gjithë përjetësinë.

Kërkoji Frymës së Shenjtë çdo ditë që të të drejtojë e udhëheqë larg të gjitha tundimeve për të mëkatuar. Kërkoji Atij që të të mbrojë nga e gjithë ligësia. Kërkoji Zotit që të sigurojë për ty gjërat që të duhen përditë, jo vetëm gjërat materiale, por edhe gjërat emocionale dhe shpirtërore që ke nevojë. Kërkoji

Atij që të krijojë tek ty karakterin e Jezus Krishtit.

Është e mrekullueshme që të kalosh kohë vetëm me Zotin, por në të njëjtën kohë është gjithashtu e mrekullueshme që të lutesh me të tjerët. Gjej një takim, apo një grup lutjeje tek i cili ti mund të përfshihesh rregullisht. Është shumë e dobishme për ty që të lavdërosh e që të lutesh me të tjerët.

Kërkoji besimtarëve të tjerë të Jezus Krishtit që të bashkohen me ty në lutje në lidhje ne nevoja specifike në jetën tënde. Jezusi tha: “Në qoftë se dy prej jush bien në ujdin mbi tokë të kërkojnë çfarëdolloj gjëje, kjo do t’u jepet atyre nga Ati im që është në qiej. Sepse, kudo që dy a tre janë bashkuar në emrin tim, unë jam në mes të tyre”. (Mateu 18:19-20).

Mos u dorëzo në lutjet e tua. Bibla thotë: “Shumë fuqi ka lutja e të drejtit kur bëhet me gjithë shpirt” (Jakobi 5:16).

Do të shikosh që sa më shumë kohë që të kalosh në lutje, aq më afër do ta ndjesh Zotin, aq më shumë paqe dhe vetëbesim do të ndjesh, e aq më shumë do ta ndjesh praninë e Tij që të drejton e udhëheq ditë pas dite. Pali u shkroi filipianëve: “Mos u shqetësoni për asgjë, por, në çdo gjë, ia parashtroni kërkesat

tuaja Perëndisë me anë lutjesh dhe përgjërimesh, me falënderim. Dhe paqja e Perëndisë, që ia tejkalon çdo zgjuarsie, do të ruajë zemrat tuaja dhe mendjet tuaja në Krishtin Jezus” (Filipianëve 4:6-7). Ah çfarë gëzimi që ke përpara ndërkohë që ecën në shtigjet që Ai ka përgatitur që ti të ecësh!!

Për të zbuluar më shumë në lidhje me lutjen, lexo Mateun 6:5-13, Psalmin 5:3, 1 Selanikasve 5:16-18, dhe Kolosianëve 1:9-12. Unë ju ftoj gjithashtu të porositni një kopje të librit tim të ri: *Prayer That God Answers – (Lutja të Cilës Perëndia i Përgjigjet)*. Ai është një libër shumë praktik ushtrimesh në lidhje me lutjen, e bazohet tek Lutja e Zotit.

Hapi 3: NDAJE BESIMIN TËND ME TË TJERË.

Shpëtimi yt është një lajm i mirë, aq i mirë sa s’mund ta mbash vetëm për vete! Kërko çdo ditë për mundësi në të cilat të mund të përmendësh emrin e Zotit në bashkëbisedim. Hera herës, mund ta kapësh veten tek thua: “Lavdi Zotit” kur diçka e mirë të ndodh, ose kur dëgjon një lajm të mirë. Nganjëherë, mund ta gjesh veten pranë dikujt, që është i lënduar. Bëji të ditur atij që Perëndia e do dhe që do ta

ndihmojë. Veprime të tilla, shpesh hapin rrugën për t'i thënë dikujt se si ai mund ta pranojë Krishtin në jetën e tij, ose se si ai mund të pranojë ndihmën e Perëndisë në një krizë. Ji i guximshëm për t'i treguar të tjerëve që Jezusi do t'i falë mëkatet e tyre e që ai vdiq në kryq që të bënte të mundur marrjen e faljes dhe jetës së përjetshme. Bibla na thotë: “Ai që shtie në dorë shpirtrat është i urtë “ (Fjalët e Urta 11:30).

Jezusi tha: “Prandaj kushdo që do të më rrëfenjë përpara njerëzve edhe unë do ta rrëfejë përpara Atit tim që është në qiej” (Mateu 10:32). Mendo pak! Kur ti flet në lidhje me Zotin Jezus me një person tjetër, Jezusi flet për ty me Atin tonë qiellor. A nuk është e mrekullueshme që të mendosh që Jezusi dhe Ati po flasin për ty sot?

Dëshmia jote për Jezus Krishtin në këtë tokë nuk është e kufizuar me atë që thua në lidhje me Zotin. Ajo përfshin të gjitha veprimet shërbyese me dashuri e bujari që ti u bën të tjerëve. Zgjidh që ta zbrazësh veten për t'u dhënë atyre që janë në nevojë. Do të shikosh që sa më shumë t'u buzëqeshësh të tjerëve, aq më shumë do të të buzëqeshin

edhe ata ty. Sa më tepër mirësi që t'u tregosh të tjerëve, aq më shumë mirësi do të marrësh edhe ti. Sa më shumë që ta bësh veten të disponueshëm për ata që janë në nevojë, aq më shumë gëzim do të ndjesh në jetën tënde e aq më shumë ndjenjë qëllimi dhe plotësimi do të ketë në jetën tënde.

Njerëzit nuk dëgjojnë vetëm ato që thua ti si i krishterë. Ata po shikojnë edhe ato që bën. Jezusi tha: "Ju jeni drita e botës; një qytet i ngritur në majë të malit nuk mund të fshihet. Po ashtu nuk ndizet një qiri për ta vënë nën babunë, por për ta vënë mbi shandan, dhe t'u bëjë dritë të gjithë atyre që janë në shtëpi. Ashtu le të shndritë drita juaj para njerëzve, që të shohin veprat tuaja të mira dhe ta lëvdojnë Atin tuaj që është në qiej". (Mateu 5:14-16). Më beso, në këtë botë të errët, të gjithë kanë nevojë që të shikojnë një person që është me të vërtetë dritë për Zotin!

Për të zbuluar më shumë në lidhje me ndarjen e besimit tënd, lexo Isaian 61:1-3. Këto fjalë të këtij profeti që u përmbushën nga Jezusi, bëjnë një përvijim të sfidës tonë si besimtarë sot për të arritur të

humburit dhe njerëzit që janë të lënduar, me “lajmin e mirë” të dashurisë, mëshirës, pranisë dhe sigurimeve nga Perëndia.

Hapi 4: SHIJO NJË BASHKËSI TË PANDËRPRERË ME TË KRISHTERË TË TJERË.

Përfshihu në kishën ku bën pjesë. Ndjekja rregullisht e kishës është vetëm fillimi. Ti duhet që të jesh në kishë, jo vetëm për miqësinë që të krishterët e tjerë mund të të japin, por edhe që të bashkohesh me të krishterë të tjerë në lavdërim dhe lutje e që të dëgjosh Fjalën e Perëndisë të predikuar me fuqi dhe bindje. Bibla na thotë: “Besimi, pra, vjen nga dëgjimi, dhe dëgjimi vjen nga fjala e Perëndisë “ (Romakëve 10:17). Fjala e predikuar e Perëndisë dhe dëshmitë e të krishterëve të tjerë, janë metoda që përdor Perëndia për të ndërtuar besimin tonë.

Të përfshihesh në një kishë do të thotë të futesh në një grup të vogël për të studiuar Biblën, për t’u lutur, ose për të marrë pjesë në ndonjë formë shërbese ungjillëzimi ndaj të tjerëve. Një grup i vogël besimtarësh kthehet në një grup llogaridhënieje për ju, në lidhje me ecjen tënde

në besim dhe rritjen tënde në Jezus Krisht. Çdo i krishterë, pavarësisht se sa i ri, apo i pjekur është duhet të jetë llogaridhënës ndaj Trupit të Krishtit në përgjithësi. Një grup i vogël siguron mënyrat e mbështetjes që të të ndihmojë në kohë vështirësish. Të siguron një mënyrë gjetjesh përgjigjesh, kur ke pyetje, inkurajim, ose dyshime. Të siguron një mundësi për t'u dhënë të tjerëve, e jo vetëm që të marrësh. Unë nuk gjej fjalë për të të inkurajuar që ti të përfshihesh në kishën tënde, në nivel grupi të vogël. Kjo është kyçe në ecjen tënde të qëndrueshme të krishterë e në përjetimin nga ty të një sasive më të madhe gëzimi të mundshëm në besimin tënd!

Për të zbuluar më shumë për rëndësinë që Perëndia i vë pasjes së bashkësisë me besimtarë të tjerë, lexo Hebrenjve 10:24-25, Kolosianëve 3:15-17, 1 Pjetrit 3:8-9, dhe 1 Pjetrit 4:9-10.

Hapi 5: BËHU NJË DHËNËS.

Bibla na mëson një standard për dhënien financiare të të dhjetës. Më lejoni t'ju tregoj një të fshehtë në lidhje me të dhjetën. Numri dhjetë

në Bibël, është numri q që përdoret për “rritjen”. Ne duhet t’i japim Zotit nga rritja që përjetojmë në jetët tona. Zoti nga ana tjetër e përdor dhënien tonë për të na “rritur”! Ti nuk mund të japësh më shumë se ç’jep Perëndia. E o mik, këtu ka një goxha gëzim. Ajo që ti jep shumëzohet nga Perëndia e të kthehet ty pikërisht në atë formë për të cilën ke nevojë më shumë. Jezusi na dha këtë mësim: “Jepni dhe do t’ju jepet: një masë e mirë, e ngjeshur, e tundur, gufuese do t’ju derdhet në gji, sepse me atë masë që do të matni, do t’ju matet dhe juve gjithashtu “ (Luka 6:38). Sa më me bujari që të japësh, aq më me bollëk do të marrësh, e Jezusi erdhi për të na dhënë një jetë të bollëkshme, një jetë që është plot e përplot me pasuritë e shpërblimeve të Parajsës (shiko Gjoni 10:10). Bibla na thotë që ata që e japin të dhjetën rregullisht do të përjetojnë dritaret e parajsës të hapura për ta deri në atë masë saqë “nuk do të kenë vend të mjaftueshëm për t’i mbajtur” bekimet që Perëndia derdh. Jo vetëm kaq, por Zoti do të “qortojë shumë gllabëruesin” – armikun e shpirtrave tanë i cili kërkon të vjedhë, vrasë dhe shkatërrojë – për

ata të cilët japin me besnikëri për hambarin e Zotit (shiko Malakian 3:10-11).

Dhënia jote është çelës për marrjen tënde. Jep me gëzim e me gaz... fjalë për fjalë jep deri në pikën e “gajasjes.” E pastaj, shijo të korrat që Perëndia siguron për ty, e ji mirënjohës për këtë. Përdore atë të korrë, nga ana tjetër, jep përsëri e jep edhe më shumë. Në këtë mënyrë ti do të krijosh një spirale gjithnjë në zmadhim që shkon për sipër, një spirale dhënieje dhe marrjeje! (Shiko 2 Korintasve 9:7.)

Më lejoni të tregohem i hapur me ju në lidhje me rëndësinë që Perëndia i vë motivimit në dhënien nga ana jote. Motivimi ynë nuk duhet të jetë motivi që nga dhënia ne të mund të marrim diçka si shpërblim. Një motivim i tillë mundet që shumë lehtë të çojë në një mendësi tamaqare e “të jap pak që të marr shumë”. Motivimi ynë kur japim duhet të jetë i rrënjosur tek gjithçka që Perëndia na ka dhënë. Motivimi ynë duhet të burojë nga dashuria jonë për Perëndinë e nga dëshira jonë për ta parë punën e Perëndisë të ecë mbarë në mënyrë që të tjerët të mund ta dëgjojnë Ungjillin e që ta njohin Jezusin si Shpëtimtarin e tyre.

Për më tepër, ne duhet që të motivohemi nga fakti që Perëndia i ka dhënë secilit prej nesh, burime të mëdha, të atilla që ne madje mund të mos i kuptojmë dot për momentin e Ai pret që ne të jemi administratorë të mirë të atyre burimeve. Perëndia na urdhëron që t'i japim punës së Tij diçka prej asaj që ai na ka dhënë ne, për të vënë në lëvizje gjërat që Perëndia do që të arrijë në këtë tokë. Atëherë, ne duhet të japim nga një zemër mirënjohëse, me një dëshirë për t'iu bindur Perëndisë dhe me një gadishmëri për t'i besuar Perëndisë që Ai t'i plotësojë nevojat tona. Ne japim si pjesë e përgjegjësisë sonë si besimtarë. Ky është një motivim i pastër për të dhënit, motiv të cilin Perëndia e nderon me shpërblime të mëdha, sepse e di që një person i cili jep me motive të tilla, do të jetë një person që mund t'i besohen bekime materiale.

Për të zbuluar më shumë në lidhje me atë që thotë Bibla, në lidhje me të dhënit e të marrit, lexo Malakian 3:8-11 dhe Mateun 13:18-23.

Hapi 6: DORËZIM I PËRDITSHËM I JETËS TËNDE NDAJ ZOTIT.

Në këtë pikë, ti mund të jesh duke menduar, ehuu o Majkëll. Padyshim

që janë ca si shumë këto që thua që duhet të BËJ. Nuk jam i sigurt a kam kohë.

Me lejo që shpejt e shpejt të të siguroj që ti ke kohë. Ajo që po të sfidoj që të bësh, është që të caktosh prioritete të reja në jetë. Nëse më përpara ke fjetur të dielave në mëngjes, tani ka ardhur koha të bësh një ndryshim e të përfshihesh në kishë. Nëse ke kaluar orë të tëra përpara televizorit çdo ditë, tani është koha për të ndarë mënjane një gjysëm ore në ditë për të lexuar Biblën tënde e për t'i folur Perëndisë. Nëse ke shpenzuar më shumë sesa buxheti yt i përmuajshëm në hipermarket, apo tek një pasion, apo argëtim, tani është koha për të riorganizuar prioritetet e tua financiare, e që t'i japësh Zotit në mënyrë që Ai të të ndihmojë që të gjesh një drejtpeshim e një nivel të ri begatie në jetë..

A mundet që gjithsesi të mund të bësh të gjitha gjërat e tjera? Po. A do të mund t'i paguash të gjitha faturat? Absolutisht po. Çështja është vetëm se çfarë vë ti të parën në jetë, e Zoti të bën thirrje që ta vendosësh Atë të parin çdo ditë. Jezusi na mësoi kështu: "Por para së gjithash kërkoni mbretërinë e

Perëndisë dhe drejtësinë e tij dhe të gjitha këto gjëra do t'ju shtohen" (Mateu 6:33).

"Por," mund të jesh duke thënë, "nuk jam i sigurt në e kam, apo jo forcën për ta bërë këtë." Fakti është që ti nuk e ke aftësinë për ta bërë këtë-as me forcat dhe aftësitë e tua njerëzore. Kjo është arsyeja përse Zoti të ka dhënë Frymën e Shenjtë. Kur e pranove Jezus Krishtin në jetën tënde, Jezusi të dërgoi Frymën e Shenjtë që të jetonte në ty për të të ndihmuar. Vullneti yt, plus fuqinë e Frymës së Shenjtë, është me të vërtetë forcë vullneti.

Çdo mëngjes, kërkoji Frymës së Shenjtë që të jetojë tek ty e të punojë përmes teje...për të të ndihmuar në çdo vendim e zgjedhje që bën, për të të ndihmuar në çdo takim që ke me të panjohur, bashkë-punëtorët dhe pjesëtarët e familjes...për të të bërë të ndjeshëm ndaj asaj që Zoti dëshiron që të thuash e bësh në çfarëdolloj situate... për ta ripërtëritur mendjen tënde, në mënyrë që të mendosh e reagosh ashtu siç do të mendonte dhe reagonte Jezusi, nëse do ta jetonte jetën tënde sot...e që të të mbrojë nga të gjitha ndikimet, njerëzit dhe përjetimet e këqija. Dorëzoja vullnetin tënd, vullnetit të Tij. Bëje

lutjen e Jezusit, lutjen tënde, “Jo si dua unë, por si do ti” (shiko Mateu 26:39).

Një dorëzim i përditshëm i jetës tënde ndaj Zotit, është një ndryshim në qëndrimin, këndvështrimin dhe fokusin tënd në jetë. Është vendosja e Perëndisë në plan të parë. Është caktimi i “njohjes së Zotit” si prioriteti yt kryesor. Ta njohësh Zotin do të thotë, ta ndjekësh, e të ndjekësh Zotin do të thotë të shkosh kudo ku Ai të drejton duke bërë çfarëdo që ai të drejton që të bësh.

Kurrë mos nënvlerëso e as mos e merr lehtë faktin që duhet kurajo dhe besim për të ndjekur Zotin ngado që ai të drejton. Ecja me Krishtin nuk është një shëtitje në park. Përkundrazi është një aventurë besimi, e si me të gjitha aventurat, ti do të përjetosh kohëra të vështira e ndoshta edhe të dhimbshme.

Duhet besim dhe kurajo për t'i thënë “jo” tundimit për të mëkatuar. Duhet besim dhe kurajo që të kuptosh që hera herës, Zoti do të të “vërë në provë”, me qëllim që të të mësojë e trajtojë si dhe për të shkaktuar ndryshimet që ai dëshiron të shikojë në jetën tënde. Perëndia i qorton ata që do me qëllim që t'i afrojë në

një perfeksion më të madh-për të larguar disa sjellje e qëndrime të caktuara nga jeta e tyre në mënyrë që ata në mënyrë më të qartë të reflektojnë karakterin e Jezus Krishtit.

Më lejoni që shpejt e shpejt të të risiguroj që nëse përjeton kohë të vështira në ecjen tënde të krishterë, ose edhe nëse lëkundesh dhe i jepesh tundimit për të mëkatuar, nuk je në rrezik të humbjes së shpëtimit. Jezusi e tha shumë qartë: “Delet e mia e dëgjojnë zërin tim, unë i njoh dhe ato më ndjekin; dhe unë u jap atyre jetën e përjetshme dhe nuk do të humbasin kurrë, e askush nuk do t’i rrëmbejë nga dora ime. Ati im, që m’i dha, është më i madh se të gjithë; dhe askush nuk mund t’i rrëmbejë nga dora e Atit tim. Unë dhe Ati jemi një “ (Gjoni 10:27-30). Perëndia nuk resht kurrë së na dashuri, dhe kurrë nuk na lë në gjendjen në të cilën na gjeti, ose nga e cila na shpëtoi. Puna e tij e dashur në jetën tonë, është një punë e përsosur, që na afron gjithnjë e më shumë me të qënurit me të vërtetë i plotë.

Zoti na bën thirrje që të jemi e të

bëjmë ato gjëra që i sjellin lavdi atij e jo neve. Duhet besim dhe kurajo që ta shtyjmë Satanin, ose “veten” tonë nga froni i jetës tonë dhe të lejojmë Zotin që të sundojë atje si mbret sovran. Duhet besim dhe kurajo që të kalosh frerët e jetës tonë tek Ai i cili me të vërtetë e di se për nga ku duhet të nisemi e si është më mirë që të arrijmë atje!

Jeta e krishterë nuk është një rrugë e lehtë, por më lejo që të të siguroj shpejt për këtë, nuk ka asnjë mënyrë më të mirë, asnjë aventurë më të madhe dhe asnjë jetë më pëmbushëse në këtë tokë sesa kjo! Për të zbuluar më shumë në lidhje me rëndësinë e dorëzimit të jetës tënde në Krisht përditë, lexo Jeremian 7:23, Mateu 26:42, dhe Romakëve 8:28-30.

Hapi 7: JI I SHPEJTË NË FALJEN E TË TJERËVE.

Sa më tepër që të falni, aq më shumë do të hyni në gëzimin e fales tuaj nga Perëndia. Jezusi na mësoi kështu: “Falni dhe do të jeni të falur “ (Luka 6:37). Jezusi tha edhe që: “Sepse në qoftë se ju ua falni njerëzve gabimet e tyre, Ati juaj

qiellor do t'jua falë edhe juve; por në qoftë se ju nuk ua falni njerëzve gabimet e tyre, as Ati juaj nuk do t'ua falë juve gabimet tuaja" (Mateu 6:14-15).

Ka rrezik të madh kur mban mërinë, zemërimin, urrejtjen dhe pezmatimin në zemrën tënde. Këto gjëra e gërryejnë zemrën e njeriut, vjedhin jo vetëm gëzimin e tyre, por edhe efektivitetin. Si përfundim, ato mund t'i bëjnë një dëm të madh trupit, emocioneve dhe marrëdhënieve të personit. Zemërimi, urrejtja, pezmatimi dhe mëria e thith energjinë e personit duke mos e lënë të përjetojë plotësisht bekimet e Perëndisë. Nëse dëshiron me të vërtetë që të jesh një person i shëndetshëm, që ecën lirshëm në dashurinë e Zotit, atëherë zgjidh që t'i falësh të tjerët.

Për sa kohë që nuk po e fal personin që të ka lënduar, refuzuar, apo që të ka shkaktuar dhimbje dhe pikëllim emocional, do të mbetesh i përqendruar dhe "i lidhur" me atë person. Le të shkojmë! Kjo është e vetmja mënyrë e vërtetë për ta lënë Perëndinë që të merret me atë person, për të të shëruar e ndihmuar ty të ecësh përpara në jetën tënde

me kurajo, paqe në zemër dhe me një ndjenjë të përtëritur qëllimi.

Falja është një veprim i vullnetit tënd. Kërkoji Zotit, që të të ndihmojë të falësh. Vullneti yt për të falur, i bashkuar me fuqinë e Zotit, rezulton në falje të vërtetë.

Si përfundim, falje do të thotë të lësh të kaluarën të shkojë, është kthimi nga çdo gjë që të mbante në mëkat e zgjedhë, një kthim drejt gjithçkaje që prodhon jetë dhe bekime. Apostulli Pal shkroi: “Po vazhdoj të rend për ta zënë, sepse edhe unë u zura nga Jezus Krishti. Vëllezër, sa për vete, nuk mendoj se e kam zënë, por bëj këtë: duke harruar ato që kam lënë pas dhe duke u prirur drejt atyre që kam përpara, po rend drejt synimit, drejt çmimit të thirrjes së lartme të Perëndisë në Krishtin Jezus “ (Filipianëve 3:12-14).

Miku im, a je duke shtyrë përpara e përpjetë sot për çmimin që Perëndia ka për ty? Falja është çelësi, i lënies që të kalojnë të gjitha lëndimet dhe pikëllimet e të shkuarës, në mënyrë që ti të mund të lëvizësh në plotësinë e gëzimit, paqes dhe dashurisë së Perëndisë.

Për të zbuluar më shumë në lidhje me faljen, lexo Efesianëve 4:31-32

dhe Kolosianëve 3:12-14.

ÇFARË E ARDHME!

Më lejoni që shpejt të përsëris për ju shtatë hapat, që ju kam dhënë në këtë broshurë. Pas çdo hapi, lexo dobitë e ndërmarrjes së tij!

1. Lexoje Biblën përditë! Ky është çelësi për përjetimin e ripërtëritjes së mendjes tënde e për reagimin ndaj jetës, ashtu siç do të reagonte Jezusi.

2. Lutu shpesh! Ai është çelësi për çlirimin e gëzimit dhe paqes në zemrën tënde, për të zhvilluar një intimitet me Zotin e për të parë plotësimin e nevojave të tua.

3. Ndaje besimin tënde me të tjerët! Ai është çelësi yt për shpërblime të mëdha në përjetësi e për të përjetuar një ndjenjë të thellë kënaqësie dhe qëllimi në jetë.

4. Shijo një bashkësi të vazhdueshme me të krishterë të tjerë! Ky është çelësi për rritjen tënde në besim dhe për zhvillimin e miqësive të vërteta.

5. Bëhu një dhënës! Ai është çelësi yt për marrjen e plotësisë së bekimeve të Perëndisë në jetën tënde.

6. Dorëzoja përditë jetën tënde Zotit! Ky është çelësi yt për marrjen e vendimeve dhe zgjedhjeve që do

të sjellin dobisë më të mëdha në jetën tënde, si tani, ashtu edhe në të ardhmen.

7. Ji i shpejtë në të falur! Ky është çelësi yt për përjetimin e një lirie të vërtetë për të lëvizur përpara e përpjetë në jetën tënde.

Profeti Jeremia tha: “Unë i njoh mendimet që kam për ju, thotë Zoti, mendime paqeje dhe jo të së keqes, për t’ju dhënë një të ardhme dhe një shpresë.” (Jeremia 29:11). Ndërkohë që ndërmerr këto shtatë hapa besimi, me të vërtetë që do të hysh në një të ardhme dhe një shpresë të madhe! Jo vetëm sot dhe nesër... por përgjithnjë.

* The Daily Bible in Chronological Order – (*Bibla e Përditshme në Rend Kronologjik*), është redaktuar nga F. LeGard Smith, e është botuar nga Harvest House.